

FAATOMUGA



E ia te a'u le ava tele e fa'alauiloa atu ai le ulua'i Ta'iala mo Komiti Fa'atonu 2019. O lenei ta'iala ua tapenaina e avea ma fesoasoani ma se fa'atonutonuga mo Komiti Fa'atonu uma a Fa'alapotopotoga a le Malo. O se ta'iala e fesoasoani foi i Komiti Fa'atonu aua le fa'amalasia o pulega lelei mo Fa'alapotopotoga a le Malo.

O lo'u fa'anaunauta'iga ina ia mafai e sui Fa'atonu ona fa'aoga lenei ta'iala aua le fa'atinoga o a latou galuega. E le gata i lea, o se fa'amamafa e tuuina atu i le a fa'atuatuaga a le Malo ia te'i latou i le faaogaina o a latou tomai ma agavaa aua le sologa lelei o galuega fa'atino ma auaunga e tuuina atu i le lautele o le atunuu.

Ia manatua "O le ala i le manuia, e le'o le pule ae afua mai ita'ita'iga lelei ma sa'o" O lea ou te fa'amalasiau ai i Fa'atonu uma ina ia fa'aoga lelei lenei ta'iala aua o lo'o iai fa'amatalaga ma galuega fa'atino e mafai ona fesoasoani e ausia ai le fa'atinoga lelei o galuega mo Fa'alapotopotoga a le Malo.

E avea foi lenei avanoa e momoli ai le fa'afetai ma le fa'amalo i le Komiti Tuto'atasi e tofia Komiti Fa'atonu ma le Matagaluega mo Fa'alapotopotoga a le Malo mo le tu'u'fa'atasiina o lenei Ta'iala taua mo Komiti Fa'atonu 2019.

Soifua ma ia manuia.



Afioga Lautafi Fio Selafi Purcell
Minisita mo Fa'alapotopotoga a le Malo.

Upu Tomua

O lenei ta'iala sa tapenaina ma tu'ufa'atasia e le Komiti Tuto'atasi e tofia Komiti Fa'atonu mo Fa'alapotopotoga fa'atasi ai ma le Matagaluega mo Fa'alapotopotoga o Samoa. O le fa'amoemoe o lenei taiala ina ia lima ta'ita'ina ai le fa'atinoina o galuega a Komiti Fa'atonu.

O le sini autu; a lava taoso Komiti Fa'atonu i le tomai, silafia ma agava'a e mo'omia i o latou tiute ma nafa, ua mautinoa foi le atagia o pulega lelei aua le fa'atautaia ma le fa'aleleia o auaunaga mo Fa'alapotopotoga a le Malo.

Anotusi

FA'ATOMUGA ITULAU

TULAFONO..... 05

Tulafono mo Fa'alapotopotoga a le Malo (Fa'atinoga o Galuega ma le Mafai ona Tali atu) 2001

Tulafono mo Kamupani 2001

Tulafono Fa'atonutonu o Tupe a le Malo 2001

PULEGA LELEI..... 08

Auivi mo Pulega Lelei

- Minisita e umia sea
- Minisita Fa'atonutonu
- Minisita mo Vaega Taitasi
- Matagaluega mo Fa'alapotopotoga a le Malo

KOMITI FA'ATONU..... 12

Matafaioi ma galuega fa'atino a Komiti Fa'atonu

- Fausia tulafono
- Va'aia lelei o tupe ma le mafai ona tali manino atu
- Fuafuaga mamao
- Lipoti ma le Fa'atinoga o Galuega
- Fuafuaga mo le fa'aitiitia o fa'afitauli e ono tulai mai
- Tofiga ma le Filifiliga o Pule Sili mo Fa'alapotopotoga

Fuafuaga autasi fa'aletausga

Fonotaga

Le Taitaifono

Komiti Laiti ale Komiti Fa'atonu

- Komiti suetusi
- Fa'atinoga o Tofiga ma Filifiliga ma le toe tagai toto'a i Fa'atinoga o Galuega

O LE SUI FA'ATONU..... 23

Tofiga ma le filifiliga

Tofiga

- Pepa Aloaia mo Tofiga
- Ta'utinoga o Aia tau tupe ma fa'asalaga fa'aletulafono

Avanoa ma le Avesea

Totogi faaletausaga

Tulafono fa'atonutonu mo Amioga Pulea

Iloiloga mo le Fa'atinoga o Galuega

PULEGA LELEI O FESO'OTAIGA..... 32

Feso'otaiga o le Minisita ma le Komiti Fa'atonu

Feso'otaiga o le Komiti Fa'atonu ma le Pule Sili

- Lagolagosua o le Pule Sili i le Komiti Fa'atonu
- Mata'ituina o le Fa'atinoga o Galuega Fa'atino a le Komiti Fa'atonu

Feso'otaiga o le Minisita o Vaega Ta'itasi ma le Pule

Sili Matafaioi o le Matagaluega mo

Faalapotopotoga a le Malo

Tulafono

Tulafono mo Fa'alapotopotoga a le Malo (Fa'atinoga o Galuega ma le Mafai ona Tali atu) 2001.

O le Tulafono mo Fa'alapotopotoga a le Malo (Fa'atinoga o Galuega ma le Mafai ona Tali Atu) 2001, o lo'o limataitaiina ai galuega fa'atino mo Fa'alapotopotoga uma a le Malo. O le fa'amoemoe o lea Tulafono ia fa'amausali ma fa'aleleia atili ai galuega fa'atino a Fa'alapotopotoga a le Malo aua le tali atu ma le tu'uina atu o auaunaga i so'o se vaega e mo'omia ai tagata nu'u o Samoa, aemaise ai le sao taua i le atina'eina o le tamaoaiga, aganu'u, agafeso'otai fa'aapea ala manuia eseese mo pisinisi.

I totonu o lenei Tulafono, ua mafai ona fa'amanino ai vaega e aloaia ai se Fa'alapotopotoga ma avea o se Fa'alapotopotoga a le Malo. O i latou nei e: (1) umia le 50% ma luga atu sea a le malo i Komiti Fa'atonu (2) e sili atu ma le 50% e umia e le Malo mo le filifiliga o sui Fa'atonu (3) e sili atu ma le 50% e umia o sea a le malo i luga o fa'aputugatupe.

E lua ituaiga Fa'alapotopotoga o lo'o i ai nei i totonu o le Tulafono mo Fa'alapotopotoga a le Malo 2001, o Fa'alapotopotoga Tau Fefa'atauaiga ma Fa'alapotopotoga Tau Fa'amanuiaga.

Fa'alapotopotoga Tau Fefa'atauaiga e tataua ona lesitala uma i lalo o le Tulafono mo Kamupani 2001 aua le fa'atinoina o galuega fa'a pisinisi. Ma e tataua ona:

- fa'atino galuega ina ia maua se polofiti/tupe mama fa'aapei o isi pisinisi e le'o umia e le Malo.
- fa'atino galuega ina ia ausia ma fa'amalieina auaunaga tu'uina atu mo tagata nu'u uma i nu'u ma afioaga
- tausisia aiaiga o le Tulafono mo le Fa'afaigaluegaina o Tagata, 2013.
- avea o se Fa'alapotopotoga e tauivi ma taulamua aua le atina'eina o auaunaga mo tagata nu'u uma i nu'u ma afioaga.

Fa'alapotopotoga Tau Fa'amanuiaga e tataua ona tu'uina atu le auaunaga lelei ma le atoatoa i ana pa'aga uma e ala i le:

- fa'amalieina o fa'amoemoega ma sini autu o lo'o i totonu o tulafono taiala.
- fa'afoeina i se tulaga atoatoa ma ausia ai taunu'uga lelei e faatusatusa atu iFa'alapotopotoga e le o umia e le Malo.
- tausisia aiaiga o le Tulafono mo le Fa'afaigaluegaina o Tagata 2013 avea o se Fa'alapotopotoga e tauivi ma taulamua aua le atina'eina o auaunaga mo tagata nu'u uma i nu'u ma afioaga.

O se tasi o fa'alapotopotoga o lo'o taua i totonu o le Tulafono mo Fa'alapotopotoga a le Malo 2001, e aofia ai le Fa'alapotopotoga Tautua a le Malo. O lenei ituiga fa'alapotopotoga e tatau foi ona tausisi i vaega taua i totonu o le Tulafono mo Fa'alapotopotoga a le Malo 2001, ma e le mo'omia ona lesitala i lalo o le Tulafono mo Kamupani 2001.

Vaega 1 o le Tulafono mo Fa'alapotopotoga 2001, o lo'o lisi uma ai Fa'alapotopotoga a le Malo.

Tulafono mo Kamupani 2001

O lenei tulafono e fa'atonutonu ma fausia ai pulega lelei o Kamupani. O lo'o manino mai fo'i i lenei tulafono le fa'atautaia ma le fa'agaioiga o se , vaevaega o tupe aemaise ai le sa'olotoga ma le aiā o pa'aga. O le Tulafono mo Kamupani o lo'o fa'amanino mai ai foi galuega fa'atino mo Komiti Fa'atonu.

O Fa'alapotopotoga uma Tau fefa'atauaiga a le Malo e tatau lava ona lesitala i lalo o le Tulafono mo Kamupani ma ia usitaia aiaiga uma.

Tulafono mo Fa'atonutonu o Tupe a le Malo 2001

O lenei Tulafono o se ta'iala aua le va'aiga ma le pulea lelei o tupe i totonu o le Malo o Samoa. O lo'o fa'amanino mai ai foi le fa'agasologa lelei ma le mata'ituina o auala i le fa'aogaina o tupe. O vaega tupe uma o lo'o sea ai le Malo o lo'o fa'amanino mai foi i totonu o lenei Tulafono.

O le vaega 91 o lenei Tulafono o lo'o toe fa'alautele ai le uiga ma vaega e aloaia ai Fa'alapotopotoga o Samoa. Vaega 91 o lo'o toe fa'amanino ai le avea ma le aloaia o se Fa'alapotopotoga ma se Fa'alapotopotoga a le Malo o Samoa pe afai e; (1) umia le 50% ma luga atu o seā ale malo i Komiti Fa'atonu, (2) e sili atu ma le 50% e umia e le Malo mo le filifiliga o Sui Fa'atonu ma (3) e sili atu ma le 50% e umia o sea a le Malo i luga o fa'aputugatupe e tatau lava ona avea ma Fa'alapotopotoga a le Malo.

Pulega Lelei

O pulega lelei o le mautinoa lea o fa'aiuga sa'o ma lelei, fa'atinoina po'o le fa'agasologa o nei fa'aiuga ma le mafai ona tu'uina atu mafuaga e tali manino atu ai i le iuga po'o le fa'atinoga o fa'aiuga. Ua mafai ona fa'amatalaina ma fa'atusaina e le Fale Tupe o le Lalolagi pulega lelei i ni faiga fa'avae ma taiala o lo'o limataitaina ai galuega fa'atino i totonu o se atunu'u. O nei ta'iala e aofia ma atagia ai malosiaga faa-le ta'ita'i i le itu tamaoaiga, faigamalo, pulega ma agafeso'otai. E i ai le talitonuga e eseese faiga fa'avae a atunu'u i vaega nei ma e taofi eseese ai foi le fa'atinoga o pulega lelei i atunuu ta'itasi. Ae peita'i, e mafai lava ona taofa'i vaega nei mo pulega lelei i vaega e tolu: malosia'ga fa'apulega, fa'aiuga fai ma le mafai ona tali manino atu e tusa ma fa'aiuga fai.

Pulega Lelei

E tolu vaega ua mafai ona taofa'i ai pulega lelei: malosiaga fa'apulega, fa'aiuga fai ma le mafai ona tali manino atu e tusa ma fa'aiuga fai. O nei vaega e mafai ona fa'atinoina i totonu o Fa'alapotopotoga aemaise ai le fa'atautaia o tagata faigaluega ma le fa'asoasoaina o alagaoa ua taulimaina aua le fa'atinoina o galuega, O nisi o vaega taua e ao ona mata'ituina ina ia atagia ai pulega lelei e aofia ai le fa'afoeina lelei, maua se taunu'uga lelei, mafai ona tali manino atu ma ia i ai ni tulaga manino po'o faiga manino aua le sologa lelei o le fa'atautaia o galuega fa'atino a so'o se Fa'alapotopotoga.

Pulega o auala mo le Fa'atinoina o Galuega

O pulega o auala mo le fa'atinoina o galuega o le mata'ituina lea o auala ma alafua aua le fa'ationina ma le fa'amautuina. O le sini autu ina ia mafai ona maioio le fa'agasologa o tiute ma aiā tatau a pa'aga eseese a le Fa'alapotopotoga ma ia aiaia ma nafataulimaina le tali atu i fa'aiuga fa'ata'atitia pe a fesiliga.

Ua mafai ona fa'alaua'itele ma fa'amatalaina e le Fa'alapotopotoga o Tamaoaiga ma Faiga Fa'avae 2004 pulega o auala mo le fa'atinoina o galuega, o se feso'otaiga i va o le Fa'alapotopotoga po'o le Kamupani, po'o le Komiti Fa'atonu, o Sui Fa'atonu ma ana pa'aga eseese. O pulega o auala mo le fa'atinoina o galuega o lo'o fa'amanino mai ai le auivi o le Fa'alapototoga, faiga fa'avae ma afua ai ona tino mai sini

autu, alafua e ausia ai sini ua fa'ata'atitia ma auala e tuliloa ai le fa'atinoina o galuega ausia.

O le Tulafono mo Fa'alapotopotoga a le Malo 2001, Tulafono mo Kamupani 2001 ma le Tulafono mo Fa'atonotonu o Tupe a le Malo 2001 o lo'o aiaia ai vaega eseese ma le taua aua le fa'agasoloina ma le fa'amausaliina o galuega lelei ina ia mautinoa fa'aiuga lelei, mafai ona tali atu ma atagia ai alafua ma fuafuaga e tatau ona fa'aogaina aua se taunu'uga lelei.

Auvi mo Pulega Lelei

Minisita e umia Sea

I totonu o le Tulafono mo Fa'alapotopotoga a le Malo 2001, o lo'o fa'amanino mai ai le Minisita e umia seā o le galuega patino lea i le Minisita o Tupe ma le Minisita mo Fa'alapotopotoga a le Malo. O Minisita ia e le gata i na umia seā ae nafa tonu fo'i ma le puipuiga o seā a le Malo.

O le nafa ma le matafaioi o le Minisita mo Fa'alapotopotoga a le Malo o le tuliloaina lea o le fa'atinoga o galuega a Fa'alapotopotoga, e patino tonu i le Minisita o Tupe le va'aia lelei, fa'asoasoina ma le fa'aaogaina o tupe e le Fa'alapotopotoga a le Malo ma ona a'afiaga e ono tula'i mai i le tamaoaiga o le atunu'u atoa.

Minisita e vaia Fa'alapotopotoga a le Malo

I totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001, o lo'o fa'amanino ai tiute o le Minisita mo Fa'alapotopotoga a le Malo aua le mata'ituina o le fa'agasoloina o galuega fa'atino ma le tuliloaina o galuega ausia a Fa'alapotopotoga a Samoa. O ia foi e:

- tu'uina iai kopi o Fuafuaga Autasi ua fa'amaonia e Fa'alapotopotoga a le Malo (Vaega 22 o le Tulafono mo Fa'alapotopotoga a le Malo 2001).
- tu'uina atu i le Palemene e pasia fa'amatalaga mo Fuafuaga Autasi ma ia o gatasi ma Fuafuaga Autasi ua maea tapenaina (Vaega 22(4) o le Tulafono mo Fa'alapotopotoga a le Malo 2001).

- tu'uina atu Lipoti fa'ale tausaga fa'apea foi ma tusi fa'amaoina a le Suetusi i le Minisita o lo'o umia seā a le Malo i se vaitaimi ia le sili atu ma le 4 o masina talu ona mae'a le tausaga fa'aletupe (Vaega 6(6.7.1) o le Tulafono mo Fa'alapotopotoga a le Malo 2001).
- tu'uina atu i le Palemene ina ia pasia fuafuaga o Lipoti fa'ale tausaga fa'apea Tala o Tupe ua mae'a pasia e Suetusi (Vaega 6(6.7.1) o le Tulafono mo Fa'alapotopotoga a le Malo 2001).

Minisita mo Vaega Taitasi

O Fa'alapotopotoga uma e le mafai ona fa'atino latou galuega e aunoa ma se Minisita o se Vaega o le Malo. E tatau foi ona ripoti atu Fa'alapotopotoga i Minisita o Vaega taitasi e tusa ai ma galuega fa'atino aua le ausia o sini o lo'o i totonu o fuafuaga autasi o Vaega Taitasi a le Malo. O sini ma fuafuaga autasi a Vaega Ta'itasi e tausinio foi ina ia fa'amalieina vaega taua e ala i polokalame fa'atino ma isi o lo'o i totonu o le Fuafuaga o Atina'e a Samoa. Fa'ataitaiga, e lipoti le Fa'alapotopotoga a le Suavai i le Minisita o Galuega ma Femalagaina i latou galuega fa'atino aua le mautinoa o le tu'uina atu o le suvai mama mo le fofoga taumafa o tagata nu'u o Samoa. O le Ofisa mo Auaunaga Fa'alesoifua Maloloina e lipoti i le Minisita o le Soifua Maloloina i a latou galuega fa'atino ina ia ausia e tagata uma auaunaga lelei mo le soifua maloloina.

E iai tulafono o lo'o limataitaiina ma aiaia ai galuega fa'atino ma le lipoti atu o Fa'alapotopotoga i le Minisita o le Vaega ae e le aveesea ai le tiute o le Minisita o Fa'alapotopotoga a le Malo i le vaaia atoa ma le tulituliloaina o galuega fa'atino a Fa'alapotopotoga ta'itasi.

O le fa'atinoga o galuega mo Fa'alapotopotoga a le Malo e pei ona aiaia i lalo o le Tulafono mo Fa'alapotopotoga a le Malo 2001 o le malosiaga lea o le Minisita mo Fa'alapotopotoga a le Malo, ma o ia lea o le Minisita e vaaia Fa'alapotopotoga a le Malo.

Matagaluega mo Fa'alapotopotoga a le Malo

O le Matagaluega mo Fa'alapotopotoga a le Malo e nafa tonu lea ma le fa'aleleia o galuega ma le tali atu o Fa'alapotopotoga a le Malo ina ia mautinoa ua latou tu'uina atu le auaunaga silisili ona lelei i le mamalu o le atunu'u. O le fa'amoemoe maualuga o le Matagaluega ia mata'ituina galuega fa'atino a Fa'alapotopotoga ina ia mautinoa o

lo'o fa'afoeina lelei auaunaga aua se taunu'uga lelei mo le atina'eina o le tamaoaiga o Samoa e tau ala atu i ona tagata.

E tusa ai ma le Fuafuaga Autasi a le Matagaluega mo Fa'alapotopotoga a le Malo (2017-2020), o le vaaiga mamao a le Matagaluega"la lelei ma si'itia le auaunaga a Fa'alapotopotoga a le Malo".

Matagaluega mo Fa'alapotopotoga a le Malo

O le manulauti a le Matagaluega"la mata'ituina ma fa'amalosia le fa'atinoina o galuega e ala i le lelei o auaunaga tu'uina atu e Fa'alapotopotoga a le Malo, ina ia mautinoa lo latou sao taua i le atina'e o le tamaoaiga ma le soifua manuia o le lautele".

O se tasi o tiute autu a le Matagaluega mo Fa'alapotopotoga a le Malo o le tu'uina atu lea o fautuaga fa'aletulafono i le Minisita i mataupu uma e patino i Fa'alapotopotoga a le Malo. E tatau foi ona taulamua i le tu'ufaatasiga ma le fa'amalosia o tulafono ma faiga fa'avae mo pulega lelei o Fa'alapotopotoga a le Malo e pei ona aiaia ai i totonu o le Tulafono mo Fa'alapotopotoga a le Malo (Fa'atinoga o Galuega ma le Mafai ona tali atu) 2001, ma isi tulafono o lo'o unaia ai le fa'atinoga o galuega a Fa'alapotopotoga a le Malo.

E tu'uina atu e le Matagaluega mo Fa'alapotopotoga a le Malo i le Minisita e umia seā a le Malo ma le Minisita e va'aia Fa'alapotopotoga a le Malo lipoti o aotelega o le fa'atinoina o galuega fa'apea fautuaga aua le alualu i luma o fa'atinoga i so'o se vaega e mo'omia.

O le Matagaluega mo Fa'alapotopotoga a le Malo o le feso'otaiga po'o le so'otaga lea i le va o le Minisita mo Fa'alapotopotoga a le Malo ma Komiti Fa'atonu.

Komiti Fa'atonu

O le fausiaina o Komiti Fa'atonu mo Fa'alapotopotoga a le Malo fa'apea le tofiaina o Fa'atonu i Komiti Fa'atonu o lo'o aiaia i totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001 ma le Tulafono mo Kamupani 2001. I totonu o nei tulafono o lo'o fa'amanino ai matafaioi aemaise lo latou malosiaga e fa'atautaia ai ma tuliloa le fa'atinoina o galuega a Pulega fa'apea pisinisi uma a le Fa'alapotopotoga.

Matafaioi ma Galuega fa'atino a Komiti Fa'atonu

O le Komiti Fa'atonu e nafa tonu ma le fa'atautaia aemaise le va'aia lelei o Fa'alapotopotoga a le Malo ina ia mautinoa le lelei o le fa'atinoina o galuega fa'atino, talafeagai le fa'aaluina o tupe ma puipuia seā a le Malo ma mautinoa o lo'o fa'afoeina lelei auaunaga o lo'o mo'omia e tagata nu'u uma o Samoa.

O le Komiti Fa'atonu foi e ta'ita'iina ma fa'afoeina le Fa'alapotopotoga ina ia mautinoa le ausia ma le fa'amalieina o galuega fa'atino o lo'o aiaia ai Fa'alapotopotoga i totonu o le Tulafono mo Fa'alapotopotoga a le Malo 2001 ma isi tulafono a le Malo. O le fa'amoemoega autu ina ia ogatasi galuega fa'atino ma sini autu i totonu o tulafono aua le tu'uina atu o auaunaga mo'omia e tagata nu'u uma o Samoa.

O nisi nei o matafaioi ma galuega fa'atino a Komiti Fa'atonu:

Faiga Fa'avae

O faiga fa'avae e avea ma taiala manino aua le fa'atinoina o galuega ma fuafuaga a le Fa'alapotopotoga ina ia ausia sini autu o lo'o i totonu o fuafuaga autasi.

E tatau i le Komiti Fa'atonu ona:

- taimua i le taitaiga ma le fa'afoeina o le Fa'alapotopotoga a le Malo.
- tapenaina ma fausia faiga fa'avae e atagia ai taitaiga manino aua le fa'atinoina o galuega a le Fa'alapotopotoga.
- fausia ma tapenaina ta'iala ma alafua e fa'ata'atitia ai sini autu e mo'omia ona ausia e le Fa'alapotopotoga.

- fausia ma tapenaina taiala e usitaia ma tausisi ai le Fa'alapotopotoga i ana galuega fa'atino o lo'o aiaia i totonu o tulafono.
- iloilo ma fa'amaonia faiga fa'avae ma ni talosaga mai le Pule Sili ina ia mautinoa lelei o lo'o o gatasi ma ausia ai le va'aiga mamao o lo'o i totonu o fuafuaga autasi.

Va'aiga Lelei o Tupe ma le Mafai ona tali atu

O le tiute mautu o le Komiti Fa'atonu o le va'aia lelei lea o le fa'aogaina talafeagai ma le fa'asoasoina lelei o tupe a le Fa'alapotopotoga. O lenei faiga e aofia ai ma le mata'ituina o alafua ma taiala mo le fa'aogaina o tupe, iloiloina o le fa'aogaina o tupe i totonu o tausaga fa'aletupe a le Malo ma le fa'amaoniga o tala fa'atatau o tupe e fa'amatu'uina mai mo galuega fa'atino a le Fa'alapotopotoga i lalo o tala fa'atatau o tupe fa'aletausaga.

E tatau i le Komiti Fa'atonu ona:

- iloilo ma tuliloa pulega lelei i faiga fa'avae e aiaia ai tupe a le Fa'alapotopotoga o lo'o taua ma fa'atulafonoina i totonu o le Tulafono mo Fa'alapotopotoga a le Malo 2001, Tulafono mo Kamupani 2001 ma le Tulafono Fa'atonutonu o Tupe a le Malo 2001.
- fesoasoani e fa'atonutonu ma fa'amanino tapula'a o le fa'aogaina o tupe, vaega e tatau ona ave i ai le fa'amuumua ma fa'amaonia tala fa'atatau o tupe e mo'omia mo le tausaga fa'aletupe ia aofia ai ma aseta mo'omia ma taiala mo le fa'aogaina o tupe.
- fa'amaonia tapula'a mo tupe alu a le Fa'alapotopotoga.
- iloilo ma fa'amaonia lipoti o tala fa'atatau o tupe fa'aletausaga ma galuega na ausia.
- ia mautinoa le fa'atinoina o iloiloga a Suetusi ma ia fa'atinoina fautuaga sa tu'uina atu.

Fuafuaga Mamao.

E tusa ai ma le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001, e tatau i Fa'alapotopotoga uma a le Malo ona tu'uina atu a latou Fuafuaga Autasi ma Fa'amatalaga o Sini Autu i le Matagaluega mo Fa'alapotopotoga a le Malo.

E tatau i le Komiti Fa'atonu ona:

- taulamua ma mautinoa ua tapenaina se Fuafuaga Autasi ma se Fa'amatalaga o Sini Autu.
- ia mautinoa o lo'o aofia itotonu o Fuafuaga Autasi galuega fa'atino ma alafua e iloilo ai galuega
- mautinoa le ogatasi o faiuga fai a le Komiti Fa'atonu ma le fa'amoemoega o le Fuafuaga Autasi a le Fa'alapotopotoga. .
- fa'atinoina ma fa'amaonia na'o galuega fa'atino e o gatasi ma le sini autu o lo'o i totonu o le Fuafuaga Autasi.
- mautinoale tapenaina ma le tu'uina atu o le Fuafuaga Autasi ma le Fa'amatalaga o Sini Autu i le Matagaluega mo Fa'alapotopotoga a le Malo.

A maea ona tapenaina Fuafuaga Autasi, ona tu'uina atu lea i le Minisita mo Fa'alapotopotoga a le Malo mo se fa'amaoniga. O le Fuafuaga Autasi ma le Fa'amatalaga o Sini Autu e tatau ona pasia ma fa'amaonia ele Kapeneta.

A maea ona pasia e le Kapeneta, ona tu'uina atu lea o le Fa'amatalaga o Sini Autu i le Palemene e tusa ai ma le Tulafono mo Fa'alapotopotoga a le Malo 2001 ma aloaia ai ma fa'amatalaga o galuega ma sini e tatau ona ausia mo le silafia e le mamalu o le atunu'u.

Faiga o Lipoti ma le Fa'atinoga o Galuega

O le Tulafono mo Fa'alapotopotoga a le Malo 2001 o lo'o manino mai ai le tatau ona tu'uina atu lipoti fa'ale tausaga fa'apea ma lipoti o kuata. O lipoti fa'aletausaga e tatau ona tu'uina i le Minisita mo Fa'alapotopotoga a le Malo i totonu o le fa (4) masina i le mae'a ai o le tausaga fa'aletupe a le Malo, ae lei o'o i le aso 31 Oketopa i tausaga ta'itasi. O le lipoti fa'alekuata e tatau ona tu'uina atu i le Matagaluega mo Fa'alapotopotoga a le Malo totonu o le tasi (1) masina pe a maea le kuata.

Ua mae'a ona fa'ata'atia e le Matagaluega mo Fa'alapotopotoga a le Malo taiala mo le fa'atinoina o lipoti fa'aletausaga ma kuata ma ua fa'amanino ai ma le auivi e fa'atino agai i ai ia lipoti.

O le matafaioi a le Komiti Fa'atonu le fa'amautinoaina o le usitaia e le Fa'alapotopotoga o taiala ma le auivi ua fa'ata'atia mo le fa'atinoina o lipoti.

Afai e le usitaia e le Komiti Fa'atonu taiala ma taimi fa'atapulaa mo le lipoti'ina o galuega fa'atino ma mata'ituina o tupe a le Fa'alapotopotoga ona le fa'amalieina lea o a latou tiute e tusa ma le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001.

E tatau i le Komiti Fa'atonu ona:

- mata'ituina ma tuliloa le fa'atinoina o lipoti fa'aletausagama fa'alekuata a le Fa'alapotopotoga ina ia maea i le taimi fa'atulagaina.
- mautinoa o lo'o tapenaina lipoti fa'aletausaga ma fa'alekuata e tusa ma taiala ma auivi fa'ata'atia a le Matagaluega mo Fa'alapotopotoga a le Malo.
- mautinoa o lo'o tapenaina tala o tupe ma mulimulitaia taiala o tupe i lalo o vaega o tupe a le lalolagi ma isi faiga fa'avae e tu'uina atu e le Matagaluega mo Fa'alapotopotoga a le Malo e tusa ma vaega i totonu o le Tulafono mo Fa'alapotopotoga a le Malo 2001.
- ia sainia ma fa'amaonia lipoti fa'aletausaga ma lipoti fa'alekuata ae le'i tu'uina atu i le Matagaluega mo Fa'alapotopotoga a le Malo.

E taua i Fa'alapotopotoga ona silafia a latou sini autu i totonu o le Tulafono mo Fa'alapotopotoga a le Malo 2001 ma e fua lava i le ituaiga Fa'alapotopotoga o lo'o iai - Fa'alapotopotoga Tau Fefa'atauaiga po o se Fa'alapotopotoga tau Fa'amanuiaga. So'o se alafua e fa'ata'atia e tatau lava ona feso'otai ma sini autu a Fa'alapotopotoga. Fa'ataitaiga, o Fa'alapotopotoga Tau Fefa'atauaiga e 50% o le latou tupe maua ua fa'amaonia e totogiina atu i le Malo ae o Fa'alapotopotoga Tau Fa'amanuiaga e aiaia ina ia fa'afoeina lelei galuega ma ia maua se taunu'uga lelei, ia gafatia se tupe maua po'o se polofiti lelei aua le fa'aleleia o aseta po'o mea totino ma mea uma e mo'omia e le Fa'alapotopotoga.

O le aotelega o tiute o le Komiti Fa'atonu ia mautinoa le tapenaina o ni alafua e lipoti ai ma tulituliloa ai galuega fa'atino a le Fa'alapotopotoga. E tatau ona atagia i lenei faiga alafua e tuliloa ai le fa'aogaina o tupe ma alafua mo isi mataupu e le a'afia ai tupe.

Fuafuaga mo le Fa'aitiitia o Fa'afitauli e ono Tulai mai

O fa'afitauli e tutupu e mafai ona lepetia ai se fa'ataunuuina o ni sini autu ua maea ona fa'ata'atia. O fuafuaga mo le fa'aitiitia o fa'afitauli e ono tutupu mai o le taumafai lea e iloilo ma vailili ni fofo e tafiese pe fa'aitiitia ai fa'afitauli.

E tele fa'afitauli e ono tula'i mai i totonu o Fa'alapotopotoga e aofia ai le aufaigaluega, tulaga tau tupe, faiga upu fai, o le siosiomaga ma isi. O fa'afitauli nei a lelei ona mata'ituina e mafai ona a'afia ai le fa'atinoga o galuega a le Fa'alapotopotoga. O le tiute o le Komiti Fa'atonu ia mautinoa o lo'o i ai ni fuafuaga ua maea tapena aua le tali atu ma fa'aitiitia ai fa'afitauli e ono tula'i mai. E tatau foi i le Komiti Fa'atonu ona fa'amalosia le silafia ma le iloa o tagata uma i nei fuafuaga.

E tatau i le Komiti Fa'atonu ona:

- mata'itu ma tapena fuafuaga e limataitaina ai taumafaiga e fa'aitiitia ai ni fa'afitauli e ono tula'i maie a'afia ai le va'aiga mamao ma sini autu a le Fa'alapotopotoga.
- tapena se auivi ma se fuafuaga e mafai ai ona iloa, iloilo, tuliloa ma fa'aitiitia fa'afitauli e ono tula'i so'o mai ma fa'ailoa vaega uma nei i le pulega o le Fa'alapotopotoga.
- tele se silafia i fa'afitauli o lo'o feagai ma le Pule Sili i le fa'atinoina o galuega i aso ta'itasi ma tu'uina atu fautuaga i vaega e talafeagai.
- mautinoa le tu'uina o fuafuaga mo le fa'aitiitia o fa'afitauli e ono tula'i mai i totonu o taiala ma fuafuaga fa'apisinisi a Komiti Fa'atonu.

O le taua o le i ai o fuafuaga e fa'aitiitia ai fa'afitauli e ono tula'i mai o le maua ai lea e le Komiti Fa'atonu o le avanoa e iloilo ai fa'afitauli ma tu'uina atu fautuaga i so'o se taimi i ni auala e iloilo ai fa'afitauli.

Tofiga ma le Filifiliga o Pule Sili mo Fa'alapotopotoga.

O le tofia ma le filifiliga o Pule Sili o Fa'alapotopotoga o se tasi lea o matafaioi autu a le Komiti Fa'atonu e tali atu ai i le Minisita mo Fa'alapotopotoga a le Malo, E tatau ona filifili e le Komiti Fa'atonu se Pule Sili e mafai ona tau'aveina galuega fa'atino i aso ta'itasi a le Fa'alapotopotoga.

E tatau i le Komiti Fa'atonu ona:

- iloilo faamatalaga o le avanoa faigaluega ma tapena le lisi o tuite ma galuega fa'atino a le Pule Sili.
- mautinoa e fa'asalalauina le avanoa i auaunaga uma e ono maua ai e tagata lautele le fa'asalalauga.
- iloilo tusi talosaga ma tapena le lisi mo i latou e fa'amanuina a latou tusi talosaga.
- fa'atino le fa'atalatalanoaga ma sui na fa'amanuiaina a latou tusi talosaga.
- tapena konekarate ma fa'ailoga mo fa'atinoaga o galuega mo Pule Sili ua fa'amanuiaina ma ia tu'uina atu i le Matagaluega mo Fa'alapotopotoga a le Malo.
- tuliloa ma iloilo galuega fa'atino a le Pule Sili.

O le fa'amaoniaga o le tofiga o le Pule Sili e fa'atinoaina e le Kapeneta ae fa'alagolago i luga o le fautuaga e tu'uina atu e le Komiti Fa'atonu. O le fa'aleaogaina foi o se tofiga a se Pule Sili e fa'alagolago foi i le Kapeneta i le fautuaga mai i le Komiti Fa'atonu.

O le konekarate o lo'o sainia e le Komiti Fa'atonu ma le Pule Sili e tatau ona ogatasi ma vaega o lo'o aiaia ai i totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001 ma isi tulafono o lo'o limataitaina ai galuega a le Fa'alapotopotoga. E tatau foi ona atagia i le Konekarate ia Fuafuaga Autasi ma Fa'amatalaga o Sini Autu ma ia mautinoa e le Komiti Fa'atonu o lo'o i ai foi ma fa'ailoga mo fa'atinoaga o galuega a le Pule Sili.

Fuafuaga Autasi Fa'aletausaga

E fautuaina le Komiti Fa'atonu ina ia tapena se Fuafuaga Autasi Fa'aletausaga e limata'itaina ai galuega fa'atino a le Fa'alapotopotoga. O lenei fuafuaga autasi fa'aletausaga o le fesoasoani malosi lea e fa'aleleia le tiute o Komiti Fa'atonu aua le ausia o pulega lelei. O nei fuafuaga autasi fa'aletausaga ia lelei ma

mausali aua le fa'atonotonuina o galuega e mo'omia ona ausia e le Fa'alapotopotoga i totonu o le 12 masina, tata'i agai i ai galuega a le Komiti Fa'atonu ma iloa ai vaega e tatau ona fa'atino aua se isi la'asaga maualuga atu.

E tatau ona atagia i lenei fuafuaga autasi fa'aletausaga tiute fa'atino a lo'o i totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001 i le vaega o faiga fa'avae, lipoti i le tala fa'atatau o tupe fa'aalu ma mafua'aga, lipoti i le fa'afoeina o galuega fa'atino. O lenei fuafuaga e tatau ona sainia e le Komiti Fa'atonu i le fa'aiuga o Iuni i tausaga ta'itasi ma feso'otai i le tausaga fa'aletupe fou (1 Iulai - 30 Iuni).

Le Ta'ita'ifono

O le Ta'ita'ifono o le Komiti Fa'atonu e fa'afoeina le Komiti Fa'atonu ina ia mautinoa le ogatasi o galuega fa'atino ma faiga fa'avae. O le tiute o le Ta'ita'ifono e taumafai e fa'amaopopo le Komiti ina ia maua le agaga o le galulue fa'atasi o sui uma o le Komiti Fa'atonu.

O le Ta'ita'ifono e tofia e le Kapeneta ae fa'alagolago i luga o fautuaga mai le Komiti Tuto'atasi e Tofia Komiti Fa'atonu (ISC).

E tatau i le Ta'ita'ifono ona mautinoa o lo'o atagia ma fa'aogaina pulega lelei i galuega fa'atino ma faiga fa'avae e tapenaina aua le fa'afoeina lelei o galuega a le Komiti Fa'atonu. E tatau foi ona atagia i nei faiga vaega ia:

- tapenaina, iloiloaina ma le tuliloaina o fuafuaga autasi aua le fa'aitiitia o fa'afitauli e ono tulai mai i totonu o Fa'alapotopotoga.
- ia tapena ni alafua e tuliloa ai le fa'aogaina o tupe ma alafua mo isi mataupu e le aofia ai tupe e tuliloa ai galuega fa'atino a le Fa'alapotopotoga.
- iloilo lipoti mo le fa'atinoga o galuega a le Pulega i totonu o masina ta'itasi.
- tapena se fuafuaga aupito sili ona lelei mo le fa'atinoina o a'oa'oga aua le si'itia o tomai ma agava'a a le Komiti Fa'atonu ma ona sui.
- e vaaia, iloilo ma tuliloa galuega fa'atino a le Komiti Fa'atonu ma ona sui.

E tatau i le Ta'ita'ifono ona mautinoa e tapena ma fa'ata'atitia se fuafuaga mo fono ta'itasi a le Komiti Fa'atonu ma ia maua e sui uma

pepa o fonotaga i taimi e tatau ai. E tatau foi i le Ta'ita'ifono ona mautinoa o lo'o mulimulitaia e sui Fa'atonu uma tulafono ua maea ona pasia i le fa'atinoina o fono, malamalama i fa'aiuga fai ma ia maumautu fa'amaumauga o nei fa'aiuga.

E leai se malosiaga o le Ta'ita'ifono e suia ai ni ta'iala ma faiga fa'avae ua maea pasia mo le Komiti Fa'atonu.

E tatau i le Taitaifono ona mautinoa ua tu'uina atu lipoti o galuega fa'atino a le Fa'alapotopotoga i le Matagaluaga mo Fa'alapotopotoga a le Malo i taimi

fa'atulagaina e pei ona aiaia i totonu o le Tulafono mo Fa'alapotopotoga a le Malo (Fa'atinoga o Galuega ma le Mafai ona tali atu) 2001.

A aloaia le le auai o le Ta'ita'ifono i se fonotaga e tatau i le sui Ta'ita'ifono ona tauaveaina le fa'afeoina o le fono. O le sui Ta'ita'ifono e filifili e le Komiti Fa'atonu. E tatau ona filifili le sui ina ia mautinoa e mafai ona ia tau'aveina tiute ma fa'afeo fono fa'apei o le Ta'ita'ifono i taimi e le auai ai.

Fonotaga

O le matafaioi autu o Komiti Fa'atonu o le mautinoa o lo'o mulimulitaia pulega lelei. O lona uiga e tatau ona fa'amausaliina o lo'o atagaia pulega lelei i le taitaiga, fa'aiuga fai, ma mafai ona tali manino atu i so'o se vaega o le Fa'alapotopotoga. O fono e fa'atinoina a le Komiti Fa'atonu e tatau ona talanoaina ma atagia ai mataupu mo pulega lelei o lo'o aiaia i totonu o le Tulafono mo Fa'alapotopotoga a le Malo (Fa'atinoga o Galuega ma le Mafai ona tali atu) 2001.

E fa (4) mafuaga taua e tatau ona faataunu'u ai fonotaga:

1. ina ia soalaupule ma fa'amaonia fuafuaga alualu mamao mo le Fa'alapotopotoga ma iloilo vaega nei ina ia feso'otai ma fa'amatalaga o sini autu a le Fa'alapotopotoga.
2. ia mautinoa o lo'o ogatasi ma feso'otai galuega fa'atino a le Fa'alapotopotoga ma ana fuafuaga mamao.
3. tulituliloa le fa'aogaina o tupe e le Fa'alapotopotoga aga'i i le tala fa'atatau o le tupe.

4. ia mautinoa o lo'o mafai ona fa'ailoa ma talanoaina mataupu uma aua le usitaia o alafua ma fuafuaga e pei ona aiaia i totonu o le Tulafono Fa'alapotopotoga a le Malo (Fa'atinoga o Galuega ma le mafai ona tali atu) 2001, Tulafono mo Kamupani 2001 ma isi tulafono ma faiga fa'avae mai le Matagaluega mo Fa'alapotopotoga a le Malo.

O fonotaga e tatau ona:

- fa'atinoina i masina ta'itasi e tusa ai ma le fa'aiuga a le Kapeneta FK(16)07, aso 24 Fepuari 2016. O nisi fonotaga fa'apitoa e fia fa'ataunu'uina, e tu'uina atu i le faitalia o le Taitaifono a le Komiti Fa'atonu.
- fa'ataunu'uina fonotaga e tusa ma ta'iala ua maea fa'ata'atia ma fa'amaonia e le Komiti Fa'atonu aua le fa'agasologa o fonotaga, o le auai i fonotaga ma aga tausili e tatau ona atagia i sui Fa'atonu i taimi o fonotaga.
- ia lelei le fa'atinoga o le fonotaga i le polokalame ma mataupu ua maea ona tapenaina e le Ta'ita'ifono po le sui Taitaifono pe a le auai le Taitaifono. E tatau ona atagia i le polokalame o le fono mataupu mo pulega lelei e

fa'atinoina e le Komiti Fa'atonu. E tatau foi ona tu'uina atu pepa mo le fonotaga, polokalame ma mataupu uma i sui uma o le Komiti Fa'atonu i aso e fa (4) mo le silafia a'o lumanai le aso o le fonotaga.

- fa'atinoina le fonotaga i le malamalamaga ua silafia e le Komiti Fa'atonu mataupu uma o lo'o talanoaina ma fa'asoa manatu ai sui ta'itasi i aga tausili e talafeagai mo le Komiti Fa'atonu.
- ia fa'amauina fa'amatalaga uma ma fa'aiuga folasia ua laugatasi ai le Komiti Fa'atonu aemaise vaega ua fautuaina le fa'atinoina ma le tuliloaina. O minute po'o fa'amaumauga o fonotaga a Komiti Fa'atonu e avea ma fa'amatalaga fa'atulafonoina. E tatau foi le fa'amauina o mafua'aga ma fa'atinoina ai fa'aiuga e pei ona folasia.

E i ai le matafaioi a le Komiti Fa'atonu i le Minisita o lo'o va'aia Fa'alapotopotoga a le Malo ma le Minisita o lo'o umia Seā o le Malo ina ia mautinoa o lo'o ausia galuega fa'atino o lo'o aiaia i totonu o o le Tulafono mo Fa'alapotopotoga a le Malo 2017. O le fa'afoeina o

fonotaga i taimi fa'atuilagaina o se tasi lea o auala e fa'atino ai tiute o le Komiti Fa'atonu.

Komiti Laiti a le Komiti Fa'atonu

E mafaia e le Komiti Fa'atonu ona fa'atuina ni Komiti laiti e fesoasoani i le fa'atinoina o galuega. E tele mataupu eseese e mo'omia ona silasila i ai le Komiti Fa'atonu ma e mana'omia ai i latou ua iai le silafia ma i ai le agava'a ma le tomai e fa'atinoina ai. E tu'uina i ai latou nei le galuega mo le iloiloina ma tu'uina mai o ni fautuaga ma ni fa'atinoga tatau ona fa'ataunu'uina i luma o le Komiti Fa'atonu mo le talanoina.

E tatau ona i ai se fuafuaga mo tiute fa'atino a Komiti Laiti e feso'otai ma le fa'amoemoe na fa'atuina ai. E tatau i le Komiti Fa'atonu ona fa'amanino i Komiti Laiti o latou tiute, alafua, fuafuaga ma tapula'a e fa'atinoina ai galuega.

E mafai e le Komiti Fa'atonu ona vala'au sui Sinia o le Fa'alapotopotoga po o nisi sui mai tagata lautele e avea ma sui o Komiti Laiti i so'o se taimi pe a mana'omia nisi tomai ma agava'a fa'aopopo po'o se manatu tuto'atasi foi mai isi pa'aga.

Komiti Su'etusi

I totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001 o lo'o aiaia ai e tatau i Komiti Fa'atonu uma e fa'atunia se Komiti Su'etusi. O le Komiti Su'etusi e fautua i le Komiti Fa'atonu e ala i:

- galuega fa'atino a Suetusi a le Fa'alapotopotoga.
- fuafuaga ma alafua a le Fa'alapotopotoga e fa'atino ai ma tuliloa lipoti fa'aletupe.
- o meatotino po o alagaoa e mo'omia mo le fa'atinoina o galuega ale Su'etusi.
- iloiloina fa'afitauli e ono tulai mai i le Fa'alapotopotoga ma mautinoa o lo'o i ai fuafuaga ma alafua ua fa'atitia e le Pulega e tu'uititia ai aua le sologa lelei o galuega fa'atino mo se taunu'uga lelei.

- iloilo fa'afitauli e ono tulai mai i vaega tau tupe ma tuliloa e mautinoa o le mulimulitaia o aiaiga i totonu o tulafono.

Komiti e iloiloina le Fa'atinoga o Galuega a le Pule Sili

E tatau i Komiti Fa'atonu uma ona fa'atuina se Komiti e iloiloina le fa'atinoaga o galuega a le Pule Sili. O lenei Komiti e aofia ai le Ta'ita'ifono, ma nisi sui se toalua o le Komiti.

O nisi uma Komiti Laiti e fausia mo nisi galuega e le tumau e mafai ona soloia i taimi e maea ai galuega fa'atulagaina.

Le Sui Fa'atonu

O le matafaioi o le sui Fa'atonu e unaia ma fa'amalosia le fa'atinoga o galuega e pei ona tu'uina mai i le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001 ma isi uma tulafono o lo'o aiaia ai galuega a le ua avea ma Sui Tofia a le Komiti Fa'atonu a le Fa'alapotopotoga.

Tofiga ma Filifiliga

O tofiga ma le filifiliga o le Sui Fa'atonu e fa'atautaia lea e tusa ma le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001. O lo'o manino ai foi aiaiga ma alafua aua le filifiliina o se sui Fa'atonu ma ua fa'atuina o le Komiti Tuto'atasi e Tofia Komiti Fa'atonu (ISC). O le Komiti Tuto'atasi e va'aia atoa le fa'agasologa o mataupu mo le filifiliina ma le tofiaina o se Sui Fa'atonu.

E toatulu (3) sui o le Komiti Tuto'atasi latou te tu'uina atu se iloiloga o manatu tuto'atasi a i latou uma sa tu'uina mai tusi talosaga mo sui Fa'atonu.

O tiute o le Komiti Tuto'atasi e tofia Komiti Fa'atonu o lo'o fa'amanino mai i totounu o le Vaega 3 o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001. O le tu'utu'uga o le fa'agasologa o galuega a le Komiti Tuto'atasi na pasia e le Kapeneta e aofia ai:

- tapenaina vaega mana'omia mo le fa'asalalauina o le avanoa o le Sui Fa'atonu.
- fa'asalalauina o avanoa uma o sui Fa'atonu.
- iloiloina o tusi talosaga.
- tapenaina o le lisi o i latou ua fa'amanuiaina mo fa'atalanoaga.
- fa'atinoina o fa'atalanoaga o i latou na fa'amanuiaina ma tusi talosaga ma toe fa'amautinoa fa'amaumauaga tau galuega agai i se tagata pe a mana'omia.
- tapenaina se lipoti mo le Kapeneta fa'atasi ma fautuaga mo le Sui Fa'atonu ua fautuaina mo le fa'amaonia e le Kapeneta.
- iloiloina o tuite, agava'a ma nafa a Sui Fa'atonu

- iloiloaina o totogi o Sui Fa'atonu ma tu'uina atu fautuaga i le Malo e tauala atu i le Komiti e pasia totogi.
- tuliloaina ma le mata'ituina o galuega fa'atino o Komiti Fa'atonu ma Sui Fa'atonu.
- tapenga faiga fa'avae ma alafua mo le fa'amalosia o fuiafuaga i le tofiga ma le filifiliga o Sui Fa'atonu fa'atasi ai ma fuafuaga mo le tuliloaina o galuega fa'atino a Sui Fa'atonu ma fautuaina ai le Kapeneta.

I totonu o faiga fa'avae o le tofiga ma le filifiliga o sui Fa'atonu, e tatau lava ona fa'asalalauina avanoa uma. O nei fa'asalalauga e aofia ai fa'amatalaga o le Fa'alapotopotoga, aofa'iga o avanoa o Sui Fa'atonu o lo'o fa'asalalauina ma agava'a ma tomai (agava'a tau su'etusi, fa'aletulafono, faufautua fa'apitoa) o lo'o mana'omia.

E tatau i a'i latou uma e tu'uina mai tusi talosaga i avanoa o sui Fa'atonu ona fa'atumuina tusi talosaga aloaia. Ia tu'uina le tusi talosaga aloaia fa'atasi ma le pepa o fa'amatalaga (CV o le tagata, covering letter) ma fa'atuatusi i le Ta'itaifono o le Komiti Tuto'atasi e Tofia Komiti Fa'atonu ae tu'uina atu i le Matagaluega mo Fa'alapotopotoga a le Malo.

E fa'ailoa uma i totonu o le fa'asalalauga o avanoa mo Sui Fa'atonu vaega ta'itasi e tatau ona tapenaina e so'o se tasi e tusi talosaga i nei avanoa.

A mae'a le taimi fa'atulagaina na tofia ai ma fa'afaigaluega ai se Sui Fa'atonu ae toe fia fa'aaau le avea o ia ma Sui Fa'atonu e tatau ona toe tusi talosaga pe a fa'asalalauina le avanoa.

E mafai foi e le Komiti Tuato'atasi e tofia Komiti Fa'atonu ona fa'atino lenei filifiliga e fa'aoga ai le Lisi oi latou uma sa tu'uina mai tusi talosaga ua te'a e fa'atino ai se filifiliga o se avanoa i Komiti Fa'atonu pe a talafeagai ai ma agava'a ma tomai mo'omia.

Tofiga

O le fuaitau mo tofiga mo sui Fa'atonu e tolu (3) tausaga. O isi sui Fa'atonu e mafai ona sili atu ma le tolu (3) tausaga ma e fua lava i luga o faiga fa'avae ma tulafono o lo'o limataitaina ai le Fa'alapotopotoga.

O tofiga uma e faia lea e le Kapeneta ia ua maea le iloiloga ma fautuaga e fa'atautaia e le Komiti Tuto'atasi e tofia Komiti Fa'atonu. O le Kapeneta e faia le fa'aiuga pe talia le fautuaga a le Komiti pe tofia foi se sui e le'i fautuaina mai.

A mae'a ona faia le fa'aiuga a le Kapeneta ona tapena lea e le Matagaluega mo Fa'alapotopotoga a le Malo o le tusi a fa'ailoa ai i le sui Fa'atonu lona tofiga ma e sefulu (10) aso e tu'u ai i le sui Fa'atonu pe talia pe leai le tofiga. E tatau ona fa'ailoa mai e le sui Fa'atonu i se imeli po'o se tusi aloaia lona taliaina po'o le tete'eina o le tofiga.

Pepa Aloaia mo Tofiga

A taliaina e le sui Fa'atonu le tofiga ona tapenaina lea e le Ofisa o le Loia Sili o Pepa Aloaia mo Tofiga (Warrant of Appointment) O Pepa Aloaia mo Tofiga e

sainia e le Ao Mamalu o le Malo ma o le tiute o le Matagaluega o le Palemia ma le Kapeneta le mautinoa ua sainia Pepa Aloaia mo Tofiga. O le tiute o le Matagaluega mo Fa'alapotopotoga a le Malo le tuliloaina o le Matagaluega a le Palemia ma le Kapeneta ia mautinoa ua sainia Pepa Aloaia mo Tofiga e le Ao Mamalu o le Malo ma logoina loa le Sui Fa'atonu ma le Fa'alapotopotoga pe a maea.

O malosiaga o Pepa Aloaia mo Tofiga e fa'amoemoe lava i faiga fa'avae ma tulafono a le Fa'alapotopotoga e patino ai.

E le mafai ona aloaia se tofiga o se sui Fa'atonu sei vagana ai ua sainia e le Ao Mamalu o le Malo Pepa Aloaia mo Tofiga. E le tatau foi i le taimi lea ona auai le sui Fa'atonu i ni fonotaga po ni fa'aiuga fai a le Komiti Fa'atonu seia vagana ua sainia e le Ao Mamalu o le Malo Pepa Aloaia mo Tofiga.

Ta'utinoga o Aia tau tupe ma fa'asalaga fa'aletulafono

O Sui Fa'atonu uma ua tofia i Komiti Fa'atonu o Fa'alapotopotoga a le Malo e tatau ona fa'atumuina le ta'utinoga o aia tatau ma fa'asalaga fa'aletulafono e pei ona aiaia ai i totonu o le Vaega 20(1) o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001. E tatau ona fa'atumuina le ta'utinoga i totonu o le tasi (1) le masina talu ona tofia. O le ta'utinoga o aiā tatau i tupe ma fa'asalaga fa'aletulafono o vaega ia e masalomia ai tupe maua a se tagata ma tupe leiloloa i se tagata po'o i latou uma e latalata ane i lena tagata.

O lo'o manino i totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001 ta'utinoaga o aiā tatau o tupe ma fa'asalaga fa'aletulafono o le aiā lea o le tasi tagata i le tasi tagata. E fa'atatau lenei vaega i se sui Fa'atonu e auai i ni fa'aiuga fai a le Fa'alapotopotoga ae o lo'o i ai ni fe'ete'ena'iga ma fa'aiuga e fa'atatau i le Fa'alapotopotoga.

E tolu (3) ituaiga aiā po'o fe'ete'enaiga e maua i totonu o Fa'alapotopotoga a le Malo. E aofia ai:

- Aiā tu'usao - vaega ia ua matua manino le i ai o le aiā tu'usao i le fa'atinoina o galuega i totonu o le Fa'alapotopotoga ma se aiā mo sona tau.
- Aiā e mafai ona iloa ma fesiligia - aiā e ono tulai mai ona o se fete'enaiga i le fa'atinoina o tiute a le Fa'alapotopotoga ma galuega a le tagata lava ia mo lona lelei ma ua matua afaina ai galuega a le Fa'alapotopotoga. E tusa lava pe ua fa'amaonia pe leai.
- Aiā e ono tulai mai - aiā e patino i le tagata lava ma e mafai ona a'afia ai le fa'atinoga o galuega ma tiute a le sui Fa'atonu i le lumanai.

I totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001, o lo'o manino ai le aiā e tatau ona i ai i le ta'utinoga ma e tatau ona pasia e le Ofisa Sili a le Matagaluega mo Fa'alapotopotoga a le Malo le fa'atinoina o le ta'utinoga e tatau i Sui Fa'atonu ona fa'ailoa vaega nei:

- fa'amatalaga auiliili e le o umia se tofi fa'a Fa'atonu i si kamupani po o isi lava Fa'apotopotoga a le Malo.
- fa'amatalaga auiliili e le o avea ma sui fa'aauau fa'apaaga ma aiā i totonu o teuteuga o tupe tausī, galuega fa'apisinisi so'ofa'atasi po isi lava fuafuaga mo le fa'asoaina o tupe mama.
- e leai se aiā fa'amanuiaina i so'o se sea.
- e leai se aiā fa'amanuiaina i so'o se pepa fa'amaonia o aitalafu.
- e leai se aiā faiga tu'usao pe le tu'usao i so'o se feagaiga po'o se feagaiga ua fuafuaina ma le Fa'alapotopotoga.
- e leai se aia i se fa'amanuiaga i se mea totino po o se tulaga tofi a le Fa'alapotopotoga.

- e leai se aiā i se faiga tu'usao pe le tu'usao e fete'enai ai aiā pe ono fete'enai aiā ma tiute o se Fa'atonu o se Fa'alapotopotoga.

E tu'uina atu e le Matagaluega mo Fa'alapotopotoga a le Malo pepa aloaia mo le ta'utinoga i sui Fa'atonu ina ia fa'atumuina ma toe tu'uina mai i le Matagaluega. E tu'uina atu e le Matagaluega le kopi o le ta'utinoga i le Ta'ita'ifono o le Komiti Fa'atonu i le fonotaga e soso'o ai.

O le Ta'utinoga mo Aiā tau Tupe ma Fa'asalaga Fa'aletulafono o se vaega e fa'atinoina e Sui Fa'atonu ina ia fa'aitiitia le tula'i mai o aiā ma fa'afitauli e ono a'afia ai le tiute tuto'atasi a le Komiti Fa'atonu.

E tali atu le Komiti Fa'atonu i le Minisita o lo'o Va'aia Fa'alapotopotoga a le Malo e tusa ai ma galuega fa'atino a le Fa'alapotopotoga. E i ai le tiute a le Komiti Fa'atonu e puipuia ai fa'amatalaga uma o galuega fa'atino a le Fa'alapotopotoga mai so'o se aiā ma fa'afitauli aga'i i pa'aga i totonu ma fafo atu o le Fa'alapotopotoga.

E tatau ona mataala sui Fa'atonu i so'o se tulaga ina ia puipuia ai latou tiute tuto'atasi ma fa'atitauli e ono a'afia ai o latou tiute i le Fa'alapotopotoga.

O le Vaega 3, 3.3.3.1(f) o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001, o lo'o fa'amanino ai le mafai ona soloia se tofi Fa'atonu pe ave'eseina se sui Fa'atonu pe a le utagia ma fa'atumuina le Ta'utinoga mo Aiā tau Tupe ma Fa'asalaga Fa'aletulafono.

Avanoa ma le Aveesea

E mafai ona avanoa tofiga mo se sui Fa'atonu pe a:

- fa'amavae se sui Fa'atonu mai le tofiga.
- pe a maliu pe tu'umalo se sui Fa'atonu.
- pe a fa'aleaogaina se sui Fa'atonu ona o tulaga nei:
 - le auai fa'atolu (3) ai i fonotaga a le Komiti Fa'atonu e aunoa ma se fa'anoi ma o se fa'anoi foi na aloaia e le Ta'ita'ifono. Afai e le mafai na auai le Ta'ita'ifono i se fonotaga e tatau na tu'uina atu lana fa'anoi i sui o le Komiti Fa'atonu.
 - tulai mai ni tulaga tau tupe ua le gafatia le fa'amalieina ma ua avea ma fa'afitauli i le tofiga.

- fa'amaonia se soli tulafono i totonu o Samoa po o se isi lava atunu'u ma ua fa'asalaina i le oti po'o le falepuipui mo le lua (2) tausaga.
 - fa'amaonia se soli tulafono i le fa'atinoina o ona tiute fa'a sui o le Komiti Fa'atonu.
 - pe a le utagia ma usitaia le fa'atumuina o le Ta'utinoga o Aiā tau Tupe ma Fa'asalaga Fa'aletulafono e pei ona aiaia ai o totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001
 - pe a ausia le 70 tausaga o le matua o le soifua ma ua le toe fautuina e le Komiti Tuto'atasi e tofia Komiti Fa'atonu ona toe tofia.
- e mafai ona soloia e le Kapeneta pe ave'eseina e le Kapeneta sui Fa'atonu po'o le Komiti Fa'atonu pe afai e le utagia vaega fa'atulagaina mo lipoti fa'aletausaga, lipoti fa'alekuata, Fuafuaga Autasi ma tala o tupe fa'atatau ma tupe fa'aalu o lo'o aiaia i totonu o le Tulafono mo Fa'alapotopotoga a le Malo 2001, Vaeaga 3 (3.3.2).
 - e mafai ona avea iloiloga o galuega fa'atino o se Sui Fa'atonu o lo'o fa'atinoina fa'atasi e le ISC ma le Matagaluega mo Fa'alapotopotoga a le Malo ma mafuaaga e le toe tofia ai o ia e avea ma Sui Fa'atonu.

O le taimi lava e mautinoa ai e le Matagaluega mo Fa'alapotopotoga a le Malo ua i ai se avanoa i se sui Fa'atonu ona logoina lea o le Komiti Tuto'atasi e tofia Komiti Fa'atonu ina ia tapenaina le fa'asalalauina o le avanoa ina ia maua se sui.

Totogi o Sui Fa'atonu

I totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001 o lo'o mafai ona maua totogi mo se tasi e avea ma sui Fa'atonu mo so o se Komiti Fa'atonu a se Fa'alapotopotoga ale Malo.

O le fa'aiuga mai le Kapeneta FK(15)31 aso 21 Setema 2015, na fa'amaonia ai totogi mo sui Fa'atonu. O te totogi o le Ta'ita'ifono e \$22,500.00 ae \$18,000.00 mo sui ta'itasi. O nei totogi o lo'o aveesea mai ai foi ma lafoga pei ona a'iaia i totonu o le Tulafonoa mo Lafoaga 2012.

O le fa'aiuga mai le Kapeneta FK(16)07, 24 Fepuari 2016 o lo'o manino ai le totogi'ina o sui Fa'atonu i le tau lua (2) vaiaso.

O totogi o sui Fa'atonu e fa'alagolago i le auai o le sui Fa'atonu ma lona tomai ma manatu fa'alia i le atina'eina o le Fa'alapotopotoga. Afai e le auai se sui Fa'atonu i se fonotaga ae mana'omia e le Ta'ita'ifono lana fesoasoani ma le auai i galuega fa'atino a le Komiti Fa'atonu ona mafai ai lea i le faitalia ma le maitau a le Taitaifono na tu'uina atu le totogi o le sui Fa'atonu.

E le mafai ona totogi se Sui Fa'atonu ae le'i faatinoina se fonotaga.

E le agava'a se sui Fa'atonu i nisi tupe po o ni fa'amanuiaga e maua atu ona o le fa'atinoina o a latou tiute ma galuega. O totogi o apitaga, femalagaaina, mea taumafa e a'afia i se asiasisiga galuega a le Fa'alapotopotoga e totogi sa'o e le Fa'alapototoga i le Kamupani o lo'o tu'uina mai le auaunaga. E fa'atino foi fa'apea malaga ma fa'alauiloa i atunu'u mamao sei vagana ai ua tu'uina mai e le Kapeneta se isi fa'aiuga mo se isi faiga.

O le totogina o a'oa'oga aua le fa'alauteleina o le malamalama o sui Fa'atonu e totogi e le Fa'alapotopotoga o lo'o patino tonu ai.

O se sui i totonu o Komiti Laiti ae le o ni sui Fa'atonu e agava'a lea i le totogi e \$250.00 i le fonotaga pei ona pasia i le fa'aiuga a le Kapeneta FK(16)07, 24 Fepuari 2016.

Tulafono Fa'atonutonu mo Amio Pulea

E le'o iai se ta'iala maumaututu e fa'atonutonu ai ma aiaia ai Amio Pulea mo Sui Fa'atonu, ae peita'i, o lo'o manino totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001, ma le Tulafono mo Kamupani 2001, aiā o sui Fa'atonu fa'apea o latou tiute e tatau ona fa'atinoina ma mulimulitaia ina ia lelei le fa'afoeina o Fa'alapotopotoga, ma maua se taunu'uga lelei o galuega fa'atino e atagia ai le fa'amaoni, le fa'aituau, fa'aaloalo, tulaga ma faiga manino ma le mafai ona tali manino atu i soo se vaega e fesiligia ai.

O le fa'atinoina o nei vaega e tatau lava ona usitaia ma atagia ai vaega nei:

- fa'amaoni, aua le fa'aituau ma ia faia galuega ma fa'aiuga ma le amiotonu i taimi uma.

- ta'utino nisi o aiā tau tupe.
- ia fa'aeteete i le fa'atinoina o tiute ta'itasi.
- ia tausisi i tulafono ma faiga fa'avae uma o lo'o limataitaina ai galuega a le Fa'alapotopotoga.
- ia tausisi i le malupuipua o fa'amatalaga uma e tu'uina mai.
- aua nei fa'aoga seseina le malosiaga fa'a Fa'atonu e a'afia ai galuega a le Fa'alapotopotoga.
- aua ne'i faia se fa'aiuga mo le Fa'alapotopotoga e le o gatasi ma aiaiga i totonu o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001 ma le Tulafono mo Kamupani 2001.

Toe taga'i Toto'a i le Fa'atinoga o Galuega

O toe toe taga'i toto'a i le fa'atinoga o Galuega mo Komiti Fa'atonu e tauala mai i le Minisita mo Fa'alapotopotoga a le Malo e tusa ai ma le fa'aiuga a le Kapeneta ina ia fa'atinoina mo Komiti Fa'atonu uma. O le mafuaga o lenei galuega ia mautinoa ai o lo'o fa'atino galuega uma a le Komiti Fa'atonu e tusa ai ma tulafono ma taiala tu'uina mai aemaise ai o Fuafuaga autasi ua tusia mo Fa'alapotopotoga.

O lenei galuega e taua tele ona e mafai ai ona taga'i toto'a iai Minisita e umia seā fa'apea le Minisita mo Fa'alapotopotoga a le malo i le galuega o lo'o fa'atinoina e Komiti Fa'atonu. E taua foi lenei galuega mo le Komiti Tuto'atasi e tofia Komiti Fa'atonu ona e mafai ai ona toe iloilo ai tomai ma agava'a mo ta'ita'ifono fa'apea Komiti Fa'atonu e pei ona iai Fa'ailo o galuega ua maea tapenaina.

E fa'atinoina lenei galuega mo Ta'ita'ifono ma Sui Fa'atonu i le (1) afa o le tofiga (2) i le mae'a ai o le tofiga.

E fa'atinoina foi le iloiloina o fa'atinoga o Galuega mo le Komiti Fa'atonu atoa. Ma o vaega taua nei e faia iai le iloiloga:

1. Pulega lelei.

- Matafaioi o le Komiti Fa'atonu.
- Matafaioi o le Ta'itaifono.
- Matafaioi o Sui Fa'atonu
- Matafaioi o Komiti Laiti Ta'itasi.

- Matafaioi of Minisita e umia sea, le Minisita mo Fa'alapotopotoga a le Malo fa'apea ma Minisita o Vaega Taitasi o le Malo.

2. Fa'aleleia o Galuega fa'atino mo Komiti Fa'atonu.

- Fonotaga, mataupu mo fonotaga.
- Fa'amatalaga o le fonotaga (Minute)
- Lisi o Galuega Fa'atino fa'ale Tausaga
- Feso'otaiga of Komiti Fa'atonu
- Ta'utinoga o Aiā tau tupe ma fa'asalaga fa'aletulafono
- Galulue fa'atasi.

3. Galuega taua mo Komiti Fa'atonu.

- Ausia galuega fa'atino i fuafuaga autasi.
- malamalamaga o le fa'atinoga o galuega ale Fa'alapotopotoga.
- auivi o le fa'atinoina o galuega fa'apea auala e mafai ona fa'aoga.
- pulega o tupe.
- lisi o galuega fuafua mamao.
- pulega o le fa'aitiitia o fa'afitauli.
- tofiga ma le filifiliga o Pule Sili.
- Malo o Samoa (faiga pa'aga ma Lipoti tuuina atu)

4. O isi galuega fa'atino ma matafaioi.

- a'oa'oga mo Komiti Fa'atonu.
- lisi of galuega mo le lumanai.
- iloiloga mo le Komiti Fa'atonu.

Pulega Lelei o Feso'otaiga

Feso'otaiga o le Minisita mo Fa'alapotopotoga ma le Komiti Fa'atonu

O le Minisita mo Fa'alapotopotoga a le Malo e nafa lea ma le tali atu i le Palemene. O lea e taua tele le malamalama ma le silafia o le Komiti Fa'atonu ia latou Fa'alapotopotoga ma a latou galuega fa'atino, fuafuaga autasi ma manulauti.

O le feso'otaiga o le Minisita mo Fa'alapotopotoga a le Malo ma le Fa'alapotopotoga e auala lea i le Komiti Fa'atonu aemaise ai le Ta'ita'ifono. O lea e taua tele le feso'otai o le Minisita o Fa'alapolopotoga ma le Ta'ita'ifono aemasie ai o ni mataupu ogaoga e patino i le Fa'alapotopotoga.

O le auala o feso'otaiga o le Minisita mo Fa'alapotopotoga a le Malo ma le Fa'alapotopotoga e taua mai i le Komiti Fa'atonu, aemaise ai lava le Ta'ita'ifono. Ma e le tatau lava ona faia ni fonotaga a le Minisita mo Fa'alapotopotoga ma le Ta'ita'ifono o se Komiti Fa'atonu seia vagana ai o le mataupu ogaoga tele ma le taua ua mo'omia vave ai se fofo.

Feso'otaiga o le Komiti Fa'atonu ma le Pule Sili o le Fa'alapotopotoga

O le filifiliga o le Pule Sili e fa'atinoina lea e le Komiti Fa'atonu, ma o le iloiloga foi ma le va'aia lelei o le fa'atinoga o galuega a le Pule Sili o le galuega e patino tonu foi lea i le Komiti Fa'atonu.

O le ala foi o le feso'otaiga o le Komiti Fa'atonu ma le Pule Sili e nafa tonu lea ma le Ta'ita'ifono.

O le feso'otaiga o le Ta'ita'ifono ma le Pule Sili e taua tele ona e mautinoa lelei ai o lo'o fa'atino e le Pule Sili galuega e pei ona tu'uina mai i Fa'ailo o Galuega, ma e fautuaina lava le Ta'ita'ifono ina ia mautinoa o lo'o iai le Pule Sili i Fonotaga a le Komiti Fa'atonu.

Lagolagosua o le Pule Sili i le Komiti Fa'atonu

O le Pule Sili e tatau ona fa'ailoa i le Komiti Fa'atonu mataupu ogaoga ma fa'afitauli e ono tula'i mai. O nisi nei o galuega fa'atino a le Pule Sili:

- la fa'ailoa mataupu ma fa'afitauli i le Komiti Fa'atonu i se taimi vave.
- la tu'uina atu tala o tupe ma fa'amaumauga i le Komiti Fa'atonu.
la fa'ailoa i le Komiti Fa'atonu ni fa'afitauli po'o ni mataupu e ono tula'i mai i ni tusitusiga i luga o auala tau feso'otaiga ma nusipepa, aemaise ai pe afai ua avea nei fa'afitauli ma mafua'aga ua le mafai ai e le Fa'alapotopotoga ona fa'ataunu'uina nisi o galuega taua.
- la fa'ailoa i le Komiti Fa'atonu nisi o fa'afitauli e patino i tulafono aemaise ai pe a ua le tausisi le Fa'alapotopotoga i aiaiga o tulafono
- la fa'ailoa i le Komiti Fa'atonu ni tulaga fa'ale tulafono ua a'afia ai le Fa'alapotopotoga.
- la fa'ailoa foi i le Komiti Fa'atonu pea afai ua fa'amaonia ua le usitaia e le Komiti Fa'atonu ni Tulafono, aiaiga ma ni taiala o le fa'atinoina o galuega.
- la Tu'uina atu le lagolago fa'afailautusi mo le Komiti Fa'atonu e ala lea i le tapenaina o pepa mo fonotaga ma le fa'amaumauina lea o Minute o Fonotaga.

Iloiloina o le fa'atinoga o Galuega a Pule Sili

O le Pule Sili e tali atu i le Komiti Fa'atonu. Ma o galuega a le Pule Sili e iloiloina lea e le Komiti Fa'atonu ma e tatau i le Komiti Fa'atonu ona fausia Fa'ailo o galuega ma taiala aua le iloiloina o le fa'atinoina o galuega mo le Pule Sili.

O le iloiloina o Galuega mo Pule Sili e fa'atinoina lea e tusa ai ma le Auivi mo Galuega Fa'atino Mo Pule Sili mo Fa'alapotopotoga ua mae'a tapenaina e le Matagaluega mo Fa'alapotopotoga a le Malo. Ma o lenei galuega e taua tele ma e tatau ona mautinoa e le Komiti Fa'atonu ua fa'atinoina tulaga uma nei;

1. Fuafuaga mamao

O fuafuaga mamao ua maea fa'ata'atitia mai e le Komiti Fa'atonu e tatau ona fa'atino ma fa'ataunu'uina e le Fa'alapotopotoga i tausaga ta'itasi. Ma o nei fuafuaga uma e o gatasi uma lava ma galuega fa'atino ua fa'ata'atia mo le Pule Sili o le Fa'alapotopotoga. E pau le eseese e ono tula'i mai pe afai lea ua va'aia ma fa'atonutonu e le Pule Sili nisi galuega ma le fa'aogaina o aseta ina ia mafai ona tino mai nisi fuafuaga e lei tu'uina atu lea i le Fa'alapotopotoga e fa'atino.

2. Iloiloina o le Fa'atinoina o Galuega

O le iloiloina o le fa'atinoina o galuega a le Pule Sili mo le Fa'alapotopotoga o se galuega e fa'aaauau pea ma e aumai fa'amaumauga uma i le Komiti Fa'atonu e tauala mai lea i le ta'ita'ifono. E tu'uina atu e le Pule Sili lana lipoti o galuega i masina ta'itasi ma e aoga lea mo le Komiti Fa'atonu e mafai ai foi ona latou galulue fa'atasi ai i galuega mo le Fa'alapotopotoga.

E iai foi le iloiloga e fa'atino i le fa'aiuga o le tausaga ma e fa'amae'a uma ai galuega o le tausaga mo le Fa'alapotopotoga.

3. Iloiloga o le fa'atinoga o Galuega Mulimuli.

O lenei iloiloga mulimuli mo le Pule Sili e fa'atinoina lea e le Soa Komiti ua mae'a fausia e le Komiti fa'atonu latou te iloiloina le fa'atinoina o galuega. Ma o lenei galuega e fa'atinoina lea ia Oketopa i le maea ai o le Galuega ale Sue tusi mo tala o le tupe mo Fa'alapotopotoga uma.

O fa'aiuga uma ua fa'amaumauina e lenei Soa Komiti e fa'ailoa uma lea i le Komiti fa'atonu ina ia mafai ona talanoaina fa'atasi e le Komiti fa'atonu ma soalaupule ai ina ia maua ai se fa'aiuga o lenei iloiloga mo le Pule Sili.

O le feso'otaiga a le Minisita o Fa'alapotopotoga ma le Minisita mo Vaega Ta'itasi a le Malo fa'apea le Pule Sili

E lē tatau ona feso'otai sa'o le Pule Sili i le Minisita mo Vaega ta'itasi, e tatau lava ona auala atu i le Komiti Fa'atonu feso'otaiga uma. I lalo o le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001, o le Komiti Fa'atonu e auala ai uma feso'otaiga ma le Minisita mo Fa'alapotopotoga. O Minisita e umuia sea fa'apea Minisita o Vaega Ta'itasi o le Malo. Ma o le Ta'ita'ifono le auala o feso'otaiga mo ni mataupu e patino i le fa'alapotopotoga.

Afai ae tula'i mai ni fonotaga i le va o le Minisita mo Fa'alapotopotoga, Minisita o Vaega Ta'itasi ma le Pule Sili, e fautuaina le Pule Sili ina ia feso'otai vave le Ta'ita'ifono o le Komiti Fa'atonu. E taua tele lenei tulaga ona o Komiti Fa'atonu ua mae'a tu'uina iai lenei matafaioi taua o le va'aia lelei ma le Pulega lelei o Fa'alapotopotoga a le Malo.

E lē fautuaina foi ni fonotaga a le Pule Sili ma Minisita e umia sea e talanoaina ai ni mataupu tau galuega fa'atino ona ua mae'a

fa'amaioio mai galuega fa'atino ma matafaioi e pei ona tu'uina mai i le Tulafono mo Fa'alapotopotoga a le Malo (Fa'atinoga o Galuega ma le mafai ona tali atu) 2001. O lo'o fa'apea ona manino mai foi i lenei tulafono le lē tatau ona auai le Minisita mo Fa'alapotopotoga i le fa'atinoina o galuega nei aemaise ai tulaga tau fa'apisinisi, fefa'atauaiga ma ni mataupu e ono a'afia ai le tulafono ona o galuega tonu nei e patino lava i Komiti Fa'atonu.

Matafaioi o le Matagaluega mo Fa'alapotopotoga a le Malo

O le Matagaluega mo Fa'alapotopotoga a le Malo e nafa tonu lea ma le fa'atautaia ma le fa'atinoina lea o le taugologolo o feso'otaiga nei i le va o Minisita fa'apea Pule Sili o Fa'alapotopotoga.

E mafai ona feso'otai le Minisita mo Fa'alapotopotoga i le Komiti Fa'atonu ma e tauala atu i le Matagaluega mo Fa'alapotopotoga a le Malo. E tatau foi ona auai le Matagaluega mo Fa'alapotopotoga i fonotaga uma ma ni fa'amatalaga i le va o le Minisita mo Fa'alapotopotoga a le Malo ma le Komiti Fa'atonu.

E tatau ona malamalama le Matagaluega mo Fa'alapotopotoga a le Malo i galuega uma aemaise ni fa'afitauli o lo'o feagai ai lea ma le Fa'alapotopotoga. E aoga foi lea e manino ai le fa'atinoina ma le fa'aogaina lelei o aseta ma tupe aemaise ai le galulue fa'atasi ai. E taua foi lenei tulaga ina ia nafa pea le Komiti Fa'atonu ma galuega uma mo le Fa'alapotopotoga.

E taua tele foi le auai o le Matagaluega mo Fa'alapotopotoga i fonotaga a le Pule Sili o le Fa'alapotopotoga ma le Minisita mo Vaega e tusa pe auai le ta'ita'ifono pe leai. E tatau lava i le Pule Sili ona fa'aailoa fonotaga i le Matagaluega mo Fa'alapotopotoga a le Malo ina ia mafai ai ona tapena mai ai se sui e auai atu i fonotaga

